

Marcas, vignetta e pralinas per ina buna caussa

La vendita da marcas ed auters products ei la fontauna finanziaria principala dalla Pro Juventute Cadi

DA HANS HUONDER / ANR

■ **Quels dis han ils affons da scola reparti las cuviartas per l'empustaziun da marcas dalla Pro Juventute. Cun il recav da quellas, mo era d'auters products che san vegnir empustai. finanziescha la Pro Juventute Cadi sias activitads en favur dils affons e giuvenils.** Mintga dus onns organisescha la Pro Juventute Cadi siu pass da vacanzas. La davosa ga ei quei stau il cass 2016, la proxima ga vegnan ils affons e giuvenils a saver guder la purschida durant las vacanzas da stad igl onn vegnent. Duront rondond duas jamnas vegn offeriu in vast program cun differents activitads naven dil cavar cristallas entochen tier far tuortas da nuschs, ina viseta ella redacziun da Radio e Televisiun Rumanntscha entochen ad ina excursiun cun observar capricorns. Cumbinada vegn quella purschida lu mintgamai era cuagl abbonament general da viafier pil Grischun pils dus meins dallas vacanzas da stad, sco era bons per kino ni in'entrada el Bogn Sedrun. Quella purschida vegn era offerida ils onns senza pass da vacanzas. Igl onn 2012 han 350 affons nezegiau la purschida dil pass da vacanzas, 2014 208 affons ed avon in onn 247 affons. Sco tier autras

uniuns ed organizaziuns senta era la Pro Juventute Cadi la digren dil diember d'affons. Il pass da vacanzas digl onn vegnent vegn dil reminent offerius dils 21 da fenadur entochen ils 4 d'uost.

Buca mo pass da vacanzas

Il pass da vacanzas ei denton mo ina da pliras purschidas dall'organisasiun che cumpeglia igl intschess dalla Cadi. Aschia ha ella offeriu dacuort in cuors da wendo per buobas ella vegliadetgna da nov entochen dudisch onns. Diesch mattatschas ein separticipadas a quel. El cuors davart il se-defender ei vegniu mussau co igl ei d'agir en cass ch'ins vegn mulestaus, provocaus, ris ora ni simplamein buca prius serius. En quel ei denton era vegniu discuriu davart temas e violenza. Leutier han las mattatschas fatg enconuschientscha cun tecnicas da se-defender. La Pro Juventute Cadi sustegn denton era famiglias en pupira, famiglias giuvnas, scolaziun speciala per affons e giuvenils ni era instituziuns che sefatschentan dils affons e giuvenils sco era indrezs ed eveniments per la giuventetgna. «Da niev paga la Pro Juventute Cadi era ina part digl abbonament da famiglia per affons che van aunc buca a scoletta dallas bibilotecas popularas da Mustér, Trun e Breil», di Lucas

Tuor da Cumpadials che preside-scha l'organizaziun dapi questa stad. Il recav dalla vendita da marcas ed auters products sco la vignetta d'autostrada van en favur da quels projects. Denter las ovras che vegnan sustenidas s'audan era ils Camps Cadi ni era il bus da notg Steila Surselva. Sper quellas entradas vegn la Pro Juventute Cadi era sustenida da donaturs e sponsurs.

Differents products

«Ils davos onns ei la vendita da marcas sereducida. Per quei motiv offerin nus era auters products. Dalla vignetta d'autostrada per exempel stattan diesch francs ella cassa dalla Pro Juventute Cadi», di Tuor. Ella paletta dils products che san vegnir empustai il medem mument cun las marcas ein per exempel era calendars, candelas, cartas, bons da kino ni era pralinas. Ina cumpart da tut quei che vegn vendiu va dil reminent era ella cassa dallas classes che fan la vendita. Sper la pusseveladad d'empustaziun cun la cuviarta eis ei era pusseivel d'empustar ils products sin la pagina d'internet projuventutecadi.ch. Il recav ord la vendita online va dil reminent buca mo en favur dalla Pro Juventute Cadi, mobein era dallas organizaziuns dalla Pro Juventute dalla Foppa e Lumnezia.



Las participantas e las menadras dil cuors da wen-do ch'ei vegnius organisaus dacuort e ch'ei vegnius purschius dalla Pro Juventute Cadi.

MAD

L'AURA

Sulegl enfin dumengia

Situaziun generala: Ina zona da pressiuon auta sur il Balcan decida dapreschent l'aura en las Alps. **Oz:** Oz gievgia èsi, malgrà nivels che arrivon dal vest, sulegliv en las Alps. Giu la Bassa tschajera ed i po era plover in zic en il nord da la Svizra. En il sid per part sulegliv. La temperatura è generalmain enturn 14 grads.

Prognosa: Damaun venderdi resti sulegliv en las Alps ed era giu la Bassa sa retiran ils nivels. La sonda èsi generalmain sulegliv cun favugn. Sin dumengia croda quel ed i cumenza a plover, per part intensiv.




FOTO E. MONN

Glina magica

■ Per ina vesta magica ha la levada dalla glina procurau ils davos dis. Sco in liun dalla mar che schonglescha cun in bal sil tgau para era quei

cuolm ella Val Tujetsch da ballontschar la glina sin siu spitz. La glina ha denton manteni quella posiziun mo paucas secundas avon ch'el-

la ei s'allontanada dil spitz dil cuolm. En egl dat era la buna e clara illuminaziun dalla glina encunter il tshiel stgjr.

Erwin Monn

WWW.RTR.CH

Türalihu Valendau

Per la renovaziun adattada a la valur istorica da quest bajetg ha la fundaziun Wüstenrot da la Germania concedi in premi da 6500 euros al patrun da construcziun ed al biro d'architectura dal Türalihu a Valendau. Tenor ina comunicaziun da l'organizaziun «Vacanzas en edifizis istorics» ha la Fundaziun Wüstenrot da la Germania premià la renovaziun dal bajetg cun la summa menziunada. Tenor la Fundaziun Wüstenrot saja la transformaziun succedida cun midadas minimalas vi da l'edifiz dal 15avel tshientaner. Las lavurs da reparatura sajan vegnidas fatgas a moda tradiziunala e las novas installaziuns na hajan betg destrui l'autenticitad e l'individualitad dal Türalihu. Il premi da la Fundaziun Wüstenrot è gia il segund premi che la «Fundaziun Vacanzas en edifizis istorics» ed il biro d'architectura Capaul & Blumenthal da Glion obtegan per quest project. L'october 2015 avevan els gia gudagnà il segund plaz da la concorrenza «Constructive Alps 2015».

Chascharia Müstair

Tut las suttascripziuns da chantun e confederaziun èn sin maisa: La societad Agricultura jaura ha pudì cumenzar cun la construcziun d'ina nova chascharia. Sper la chascharia duai anc dar in local per mazzar ed elavurar charn ed in local per elavurar graun. Tut las trais parts dal project da svilup regiunal vegnan a custar radund otg milliuns francs. La chascharia nova furma la gronda part dal project e custa radund quatter milliuns francs. Sper subvenziuns da chantun e confederaziun ha era il padrinadi per regions da muntogna da la Coop sustegnì il project da la nova chascharia. La construcziun duai esser terminada en in onn. L'october 2018 quinta il president communal da Val Müstair, Rico Lamprecht, da pudair inaugurar il stabiliment. La chascharia actuala na correspunda betg pli a las pretensiuns dad oz. Las ulteriuras parts dal project, dasper la chascharia, èn en planisaziun. La societad Agricultura jaura sto anc seguir la finanziaziun dal nov local per mazzar ed elavurar charn e dal local per elavurar graun.




Andrea Masüger, il CEO da Samedia, spera sin in «Na» a la No Billag

No Billag fiss in culp

■ **Andrea Masüger, CEO da la chasa da medias Samedia di: Tar in «gea» a l'iniziativa No Billag stuessen RSO e TSO chalar ed i gessan a perder circa 60 plazzas da lavur.** L'iniziativa che vul abolir taxas da radio e televisiun, numnada curt «No Billag», tutgass en il Grischun betg sulet RTR, RSI e las parts da SRF, mabain er la chasa da medias Samedia. Glindesdi saira ha Andrea Masüger rendi attent quai en connex cun ina sairada da la ped dal Grischun. La Samedia producescha products da print sco las gassetas «Südschweiz», il «Bündner Tagblatt» e «La Quotidiana», plinavant ina purschida online, il radio RSO e la televisiun TSO. Or dal pot da taxas survegn

la Samedia radund 7 milliuns francs. La «TSO» vegn finanziada per 70 pertschient da quellas taxas, il radio er bun la mesadad. «Senza quels daners na fissi betg pli pussaivel d'emetter», ha ditg il CEO da la Samedia en sia preschentaziun. Er in program reduci na fissi betg pussaivel da far cun ina mancanza da daners tant gronda: «Alura stuessan nus reducir uschè fitg che nus pudessan forza anc far in'ura program per di, e quai n'è betg pli attractiv», ha rendi attent Masüger. Era subvenziunar RSO e TSO a travers, entras autras spartas da la Samedia, saja betg realistic: «Nus na pudain betg prender 7 milliuns francs d'enzauna auter.» ha ditg Masüger.



CARRICATURA L. FLEPP